

國史考異

辛酉十月二十有八日得於上海冷攤

此為潘氏原刻極為罕覯潘文勤功
順堂刻即從此出余別有松獻陵文
獻亦力田所著力田傳世祇此二書余
皆獲之信於文字有宿緣矣

沅舛記

國史考異卷之一

吳江

潘極章力田撰

吳炎赤溟訂

高皇帝上

一

實錄 太祖高皇帝姓朱氏諱元璋字國瑞濠之鍾離東鄉人也其先帝顓頊之後周武王封其苗裔於邾春秋時子孫去邑爲朱氏世居沛國相縣其後有徙居句容者世爲大族人號其里爲朱家巷高祖 德祖曾祖 懿祖祖 熙祖累世積善隱約田里宋季時 熙祖

始徙家渡淮居泗州父仁祖諱世珍元世又徙居鍾離之東鄉勤儉忠厚人稱長者母太后陳氏生四子

上其季也自德祖而上世次既莫能明而三祖諱字

亦無所表見至嘉靖十年行大禘禮推帝者所自出或

謂宜禘德祖或謂宜禘顓頊上皆不從曰可稱

皇初祖帝神勿主名論者咸服宸斷周詳而惜當時

禮官無能追發祥之自以佐末議者豈果不可考耶抑

記注者之疏略耶翦勝野聞載太祖自叙世德碑云

本宗朱氏出自金陵之句容地名朱巷在通德鄉上世

以來服勤農業五世祖仲八公娶陳氏生男三人長六

二公次七二公其季百六公是爲高祖考娶胡氏生二
子長四五公次卽曾祖考四九公娶侯氏生子曰初一
公初二公初五公初十公凡四人初一公配王氏是爲
祖考妣有子二人長五一公次卽先考諱世珍元初籍
淘金戶金非土產市於他方先祖因于役遂棄田廬攜
二子遷泗州盱眙縣先伯考五一公十有二歲先考纔
八歲先祖營家泗上置田治產及卒家日消繇是五一
公遷濠州鍾離縣其後因至鍾離居先伯娶劉氏生子
四人重一公重二公重三公生盱眙重五公生鍾離先
考娶徐氏

徐氏當爲陳氏
傳寫之誤也

泗州人長重四公生盱眙次

重六公重七公生五河某其季也生遷鍾離後戊辰年
先伯考有孫六人兵興以來相繼沒先兄重四公有
子曰文正今爲大都督重六重七俱絕嗣甲申歲父母
長兄俱喪次兄守業又次兄出贅劉氏某託跡縑流至
正十二年天下大亂諸兄皆亡淮兵大起掠入行伍龍
鳳元年帥師渡江駐兵太平爲念先考君嘗言世爲朱
巷人宗族俱存平日每有鄉土之念卽訪求故鄉宗族
之所遂調兵取句容明年克金陵而朱巷距城四十里
舉族父兄昆弟四十餘人至始得與之叙長幼之禮行
親睦之道但朱氏世次自仲八公之上不可復考今自

仲八公高曾而下皆起家江左。歷世墓在朱巷。唯先祖
葬泗州。先考葬鍾離。此我朱氏之源流也。按碑中所序
統系昭然。自德祖而上。尚有仲八公一世。其墓皆在
朱巷。而諸書俱未之及。特以太祖追崇之典。僅及四
代。故闕而不記耳。非果無可考也。一統肇基錄載皇
陵碑原文。較世德碑稍略。內言朕長兄諱□□生于津
律鎮。仲兄諱□□生于靈璧縣。三兄諱□□生于虹縣。
及皇考年五十。居鍾離東鄉。而生朕甫十歲。復遷鍾
離之西鄉。長兄侍親。仲兄三兄皆出贅。而復遷太平之
孤庄村。亦與前碑異。此卽洪武十一年御製碑所云儒

臣粉飾之文不足爲後世子孫戒者也。解綽大明帝典
謂高皇帝系出顓頊。周諸侯國于邾。漢太司空浮之
裔也。始居丹徒。後渡江家于泗。仁祖暨陳氏習夢于
休。天曆元年戊辰九月丁丑旦誕帝。夫世德碑明言
仲八公之上不復可考。而帝典遠祖司空浮何據。且以
句容爲丹徒尤爲乖舛。晉讀承休端惠王統宗繩螯錄
云九二一公姓朱氏諱伯通。漢時山東兗州府仙源縣
興賢鄉人。漢未有此府縣名傳十五輩至南齊時有諱永昌者。
拜官著作郎。又傳二十五代至宋初因兵徙居建康句
容縣榨油爲生。家凡二百九十六口。重八公。太祖之

五世祖世居句容之朱巷通德鄉子三長六二公次十公次伯六公是爲德祖子二長四五公次四九公是爲懿祖子四長初一公是爲熙祖次初二公次初五公次初十公熙祖子三長五一公是爲壽春王子四孫六兵興相繼而沒次五二公次五四公諱世珍是爲仁祖子四長重四公諱興隆是爲豫章王卽南昌王次重六公諱興盛是爲盱眙王重七公諱興祖是爲臨淮王太祖諱興宗後諱□是書纂自藩府必非無所徵信而敢爲撫入者其大略與世德碑相發明獨所稱九二一公世次荒遠非聖祖闕疑慎微之意

也重八公卽仲八千十公卽七二傳寫異耳然碑稱

祖考妣子二長五一公次卽先考無所謂五二公者天

潢玉牒亦云熙祖二子長壽春王次仁祖淳皇帝

而繩螯錄獨言熙祖子三其敘熙祖攜仁祖及

壽春王遷泗州又不及五二公亦不言其有子無子或

疑五二公幼而殤庶幾近之鄭端簡以壽春爲仁祖

之弟誤也永樂七年二月遣官祭皇伯祖壽春王見寶錄周氏刻天潢世系又

以壽春安成蒙城與仁祖竝列而爲四不知所本夫

安成之號未之前聞蒙城則壽春子耳豈可躋之兄弟

之列耶漢武元年正月詔追封皇伯考爲壽春王

皇兄 爲南昌王 爲盱眙王 爲臨淮王 皇從
兄 爲霍丘王 爲下蔡王 爲安豐王 爲蒙城王
皇姪 爲山陽王 爲招信王 皇從姪 爲寶應
王 爲六安王 爲來安王 爲都梁王 爲英山王
今太廟兩廡侑享十五王是也。繩螭錄載壽春王四子
長重一公是爲霍丘王。次重二公是爲下蔡王。次重三
公是爲安豐王。次重五公是爲蒙城王。霍丘二子長高
沙王。賽哥。次寶應王。鐵哥。安豐四子長六安王。轉兒。次
來安王。記兒。次都梁王。臊兒。次英山王。潤兒。蒙城無嗣。
按世德碑載高沙王未祔享。追封之詔亦不及。諸書獨
遺高沙

者蓋定伯事之後追削之耳。故今言謂霍丘唯一子寶應王耳。高沙而下六王。卽碑所云。兵興以來。相繼寢沒者也。而或耐或否。不得其說。又考繩螫錄。南昌二子。長山陽王聖保。次大都督文正。盱眙一子。招信王旺兒。與碑稱先兄有子文正。及重六重七俱絕嗣者不合。豈山陽招信亦幼而殤者耶。寶錄書法旣略。而有司漸失其傳。天潢世系遂謂霍丘等王之出壽春。寶應之出霍丘。六安等王之出安豐。皆靡有確據。不亦疏乎。

二

寶錄壬辰春二月乙亥朔。定遠人郭子興孫德崖等起。

兵自稱元帥攻拔濠州。據其城守之。辛丑。亂兵焚皇覺寺。寺僧皆逃散。上亦出避兵。太祖紀夢云。壬辰二月二十七日。陷濠城而拒守之。哨掠四鄉。焚燒廬舍。則濠城之拔。卽在辛丑。焚皇覺寺者。亦其兵也。俞本記事錄云。至正十二年正月。定遠富民郭姓者。燒香聚衆。稱濠州節制元帥。十一日起定遠。二月二十六日克濠州。三月初二日克曹縣。所紀克濠之日。較紀夢止先一日耳。當從御製集爲是。又實錄謂太祖憂亂避兵。禱于伽藍神。固守旬月。而後有故人相招迫脅之事。以及子興畱侍左右。尋命長九夫。皆用皇明本記原文。以皇

陵碑紀夢及天潢王牒。泰攷蓋先有相招迫脅之事。而後決於神。迫入濠。被收爲步卒。兩月餘。纔爲親兵耳。史雖稍支其詞。然不若據實直書之可傳信。

三

實錄壬辰九月。元兵復徐州。徐帥彭早住均用。率餘衆奔濠。癸巳冬。早住自稱魯淮王。均用自稱永義王。錢氏羣雄事略云。滁陽王廟碑及皇明本記紀二姓僭稱。俱在壬辰奔濠之時。與實錄異。以高帝紀夢考之。則云。明年元將賈魯死。城圍解。予歸鄉里。收殘民數百。獻之上官。以我爲鎮撫。當年冬。彭趙僭稱。部下多凌辱人。

所謂當年冬者。癸巳冬也。以時勢言之。二姓雖草草僭稱。亦當在元兵解圍之後。而不在自徐奔濠之日。當以實錄爲正。又元史順帝紀。辛卯八月。蕭縣李二及老彭趙君用攻陷徐州。老彭者。早住之父。彭大也。芝麻李旣敗。則彭大當與君用俱奔濠。實錄不書彭大。而書早住。又書曰。午六月。上取滁陽之後云。

實錄此條在癸巳六月。非甲午。

踰月。彭趙遣人邀上守盱泗。上辭弗往。未幾。二人

自相吞併。早住亦亡。惟君用專兵柄。按順帝紀。又於丁酉歲。書君用及彭大之子早住同據淮安。趙僭稱永義王。彭僭稱魯淮王。則丁酉歲早住尚在。以理度之。癸巳

之夏與君用吞併而亡者。乃彭大。非早住也。實錄於早住既亡之後。記上使人說君用及賂其左右以解子興。而廟碑及天潢玉牒俱云。彭趙東屯泗州。挾王以往。遣人賂彭趙得縱歸。則又早住不死之明證也。龍鳳事蹟云。先是芝麻李故將趙均用彭早住據淮安。僭稱王。早住死。均用益自專。永義奔山東依毛貴。此早住死於淮安之明證也。二姓僭稱之事。在壬辰癸巳間者。諸書載之甚確。而順帝紀又載於丁酉歲者。蓋彭大既亡之後。早住與均用同陷盱泗。同據淮安。均用既僭稱永義。而早住襲其父之舊。仍稱魯淮。故元史又從而記之。稱

彭大之子早住。其意甚明。修太祖實錄者。殆未攷耳。此條援据極詳。但旣以僭稱屬之彭大。斷在癸巳冬。而又以其夏吞併而亡者爲彭大。則所謂以矛陷盾。無一可矣。實錄於癸巳五月附書。是冬早住自稱魯淮王。均用稱永義王。又於六月終言。未幾二人自相吞併。早住亦亡。今謂亡者彭大。非早住。而其吞併之期。計亦不久。則是冬稱魯淮王者。彭大邪。抑早住邪。余意彭趙本以窮蹙來奔。旣脫鋒鏑之餘。坐擁專城之柄。志得氣張。遽萌僭擬稱王之舉。卽在壬辰彭大奔濠之時。而不必在癸巳元兵解圍之後。此亦草竊嘗態。無可疑者。惟以彭

大稱王。斲在壬辰。則癸巳之歲。彭大先亡。而早住襲其遺號。陷盱泗。據淮安。至丁酉以後。始沒不見。如此。文從事順。於理爲長。考平胡錄。均用稱王在壬辰之十一月。則彭大亦以此時自王明矣。

四

鄭氏今言云。滁陽王夫人張氏。三子。長駸沒。次陷沒。幼以陰謀伏罪。次夫人張氏。一女爲皇妃。生蜀王豫王如意王。卽谷庶人又云。王長子郭大舍。張夫人出。戰沒。一女惠妃。生蜀豫如意三王。汝陽永嘉二公主。次張夫人出。又次李夫人。生郭老舍。洪武四年旨云。說與郭老舍再三。

畱你不住實要回鄉守祀。你舊有二所庄田。我就賜與
你耕種。敎戶部官開除糧草。十一年。鄰人賁童兒註誤
出走十七年。上諭張來儀撰王廟碑。遂云王無後。令
滁州衛千戶王傑等二十三人供祀事。二十八年。老舍
還鄉。爲費謙所發。解黑窑場做工。上面諭放回。令一

年一朝京師。

南京太嘗寺志云二十八年

太祖令旗手衛官李忠召老舍于黑窑廠于四川候

蜀王

老舍卒。諭葬立石。老舍生謙。謙生昇。昇生信。信生琥。

皆一歲一朝。有籍於禮部鴻臚寺。縣前所記。則滁陽三
子。皆張夫人出。無所謂老舍者。縣後所記。則止有大舍
老舍二子。而所謂陷沒與陰謀伏罪者。又何人也。按實

錄洪武三年二月追封郭子興爲滁陽王立廟滁州仍

繪三子從祀

南京太常寺志云王三子未娶俱亡

此王有三子之明證也

俞本記事錄云夫人張氏生三子長戰沒次爲降人所

陷卽郭元帥幼與羣小陰謀伏罪滁陽王廟碑亦同今

以諸書叅之王長子戰死當在濠州起事之初實錄載

王爲孫德崖所執太祖與王二子圍孫氏破械而出

皇明本記亦言以次夫人攜二子往告早住通紀又載

二子置酒謀毒太祖事則此時長子已前卒故名不

傳耳次子名天敘記事錄云乙未四月郭元帥卒衆奉

其子天敘爲都元帥張天祐次之上又次之十月郭

張二元帥督兵繇城塘經同山進攻建康之東門陳也
先自板橋直抵建康攻南門自寅至午城中堅守也先
邀郭元帥飲殺之擒張元帥獻于福壽亦殺之陳基撰
福壽勲德詩序云官軍與也先表裏合攻遂生擒僞元
帥郭張二人實錄俱略不書第云戰死蓋所謂陷沒及
爲降人所陷者卽天敘也幼子各天爵記事錄云丙申
三月毫都以故元帥郭天敘弟天爵爲右丞戊戌七月
右丞郭天爵謀叛誅之所謂陰謀伏罪者卽天爵也然
則三子之始末甚明而老舍之說何自來乎王氏二史
致以爲老舍必滁陽之族年少長者若其幼子則在洪

武四年時當尚少。而何以曰老舍。使果滁陽王子。是不
昨茅土之封。必罹金罍之賜矣。寧能晏然而已乎。此亦
臆度之論。未及深究也。老舍事見于歷朝實錄者甚悉。
如宣德元年正月己亥書賜滁陽王之親郭昇等鈔嘉
其來朝也。正德八年七月壬辰書革滁陽王墳奉祀郭
琥職。王無後。國初以蜀王主祀。蜀王之國掌滁之衛事
者主焉。琥定遠人。弘治間自言爲王後。孝宗賜以冠
帶。又援楊徐二王例。乞奉祀。亦許之。廟戶王璽等數辨
其妄。今言云弘治癸丑琥奏得旨冠帶守祀壬戌奉祀
與供奉祀正德癸酉琥又求印信王傑裔孫璽奏
琥詐至是琥復乞署印。下吏禮二部議曰。王奉祀典。

定于 聖祖勅諭非所宜更其曰無後見于所製碑非
可攀附 先帝假琥以福職繇覆議者失詳今乃求諱
不已宜奪其職 上是之曰王祀禮悉遵 皇祖所定
琥仍如 先帝初命以冠帶榮其身如再奏擾當重治
之嘉靖十五年七月書 高皇帝時滁州人郭老舍以
里開布衣被眷厚或曰老舍滁陽王第四子弘治中老
舍四世孫郭琥遂以冠帶奉滁陽王祀後爲宥世傑奏
革世傑始祖曰興者滁陽王廟戶也其子仁卿洪武時
與同戶濮僧奴等犯法仁卿被誅僧奴等克雲南大理
軍郭琥憾宥氏之奏革其奉祀也因奏宥氏抵大理軍

以相報復。至是琥子厚與宥孟貞者各奏託。下有司覈實。兵部覆議郭老舍爲滁陽王子。無據。宥氏異姓不應抵軍。詔行雲南除孟貞軍。厚以奏事不實論罪。今言云正德辛巳琥復奏吏部議送法司問罪嘉靖元年奉旨郭琥准與原校職銜以榮終身不許干預祀事俱誤繇此觀之。乃知老舍爲滁陽王親。非其幼子。宣德時去王未遠。故所記最覈。郭琥詐冒成案昭然。鄭氏未見國史。故姑爲存疑之詞耳。乃剪勝野聞又載太祖微時爲郭氏五男所惡。嘗以事幽之空室中。其語尤爲無稽。不足置辨。

實錄丙申七月。上取臺城。諸將奉。上爲吳國公。通紀諸書並同。晉疑。太祖以乙未三月始承宋檄爲副元帥。位在第三。及攻集慶。郭天敘。張天祐皆死之。然後太祖專制軍事。其年之間。僅得太平。建康。鎮江。廣德。三四州郡耳。一時諸將皆故等夷。特以事權相下。安有偃然建號而中外推戴無異詞哉。及攷俞本記事錄。是月毫都陞。上爲樞密院同僉。尋陞。上爲江南等處行中書省平章。己亥十二月。克處州。毫都陞。上爲丞相同僉。辛丑正月。毫都陞。上爲吳國公。所記封爵次第甚詳。是吳公之建號在辛丑而非丙申明矣。劉辰國

初事蹟紀 太祖克婺州之年五月。太祖爲儀同三

司江南等處行中書省左丞相。卽己亥之五月也。與記

事錄合。但繫月不同耳。趙汭撰汪同傳云。丁酉七月鄧

院判請往金陵。遂見相國。此時未置相國。蓋指 太祖

爲平章而言也。錢氏辯證謂辛丑十一月葉子奇上孫

炎書有曰丞相以雄傑之才。紹開中興之運。按靜齋文集此書在

己亥十一月孫炎總制處州之時非辛丑也錢氏誤引耳而壬寅冬航海之使猶齋

行省平章宣命。則丙申之未開吳國斷可知矣。漢高未

王巴蜀不改沛公之稱。光武初徇昆陽但循太嘗之號。

帝王之興。豈以區區封爵早晚爲重輕哉。史臣于是爲

無識矣。余謂俞本所稱毫都者宋也。史臣于龍鳳間事多所避諱。故凡除拜位號之制俱削不載。至以吳公之封爲出諸將尊奉。不幾誣乎。

太祖自序世德碑云。龍

鳳九年三月十四日。內降制書。曾祖考爲江南等處行中書省右丞。上護軍司空吳國公。祖考爲江南等處行中書省平章政事。上柱國司徒吳國公。先考爲開府儀同三司錄軍國重事平章右丞相吳國公。妣皆吳國夫人。蓋當時宋制如此。此在救安豐之後。太祖尚不以稟命爲嫌。而史臣遂欲盡沒其實。何耶。宋濂誌王愷墓云。丙申春。從王師下建業。又下京口。上爲中書平章。

政事。建江南行中書省于建業。陞公左右司都事。朱升作鄧愈勲德頌。在丁酉秋。亦稱江南行省平章朱公。不聞其稱吳公也。非特此也。實錄許瑗本傳。上取婺州瑗謁。上但稱閣下。此非卽爲平章時乎。辛丑七月。宋思顏言事。始稱上爲主公。十一月。劉基勸伐漢。亦稱主公。則知是年已開吳國矣。自甲辰以後。省臣移書及王禕。許存仁等進對。皆稱太祖爲主上。然則自公而進王。卽稱號之間。約略可見。孰謂文獻不足徵哉。

六

實錄丙申七月。徐達攻嘗州。張士誠遣其弟張九六來。

援遇伏。馬蹶爲先鋒。刁國寶。王虎子所獲。并禽其將張

湯二將軍。九六卽士德。太祖御製徐武寧神道碑亦

首載其事。

按碑後有朱善劉三吾跋語意必屬二臣視草非盡御筆也

而宋文憲撰

趙德勝神道碑云。丁酉七月丙子。攻嘗熟。張士德出挑

戰。公麾兵而進。士德就縛。士德士誠之弟也。天潢玉牒

亦云。丁酉六月。取江陰州。攻嘗熟。獲張士誠弟士德。以

歸。

按取江陰在六月。攻嘗熟在七月。此牽連書之耳。

皇明本記則云。破其兵于

宜興湖橋。擒其弟張九六。並獲其戰船馬匹。湖橋在嘗

熟虞山西北。通福山港。爲舟師入江要地。故士德被擒

于此。其曰宜興。傳聞之誤也。以諸書覈之。則知士德之

擒當於丁酉嘗熟之役而不於丙申嘗州之戰矣。實錄
丁酉七月丁丑徐達兵徇宜興取嘗熟擊張士誠兵敗
之宋文憲撰碑則系之丙子。先一日固知德勝本從大
將軍縛士德而實錄脫之耳。臨海陳基有望虞山弔張
楚公詩錢氏辯證引之以訂實錄之誤其略曰實錄是
年十月士誠以其弟被擒遣孫君壽請和願歲輸糧二
十萬石黃金五百兩白金三百斤劉辰國初事蹟以爲
士德母痛其子故也然士誠旣以失弟而聳懼又以母
命而請和其遺書何以了不置喙高帝之復書則曰
攻圍嘗州生擒張湯二將尚以禮待未忍加誅爾所獲

詹李。乃吾偏裨。無益成敗。張湯二將。爾左右手也。爾宜
三思。我師旣禽士德。獲其謀主。又何以匿而不言。但及
張湯二將耶。其誤一也。元史丙申七月。士誠兵陷杭州。
楊完者擊敗之。陶九成輟耕錄紀杭州之役。士德與王
與敬偕往。以諸書互攷。則士德陷杭在七月。其敗歸平
江當在八月。輟耕錄士德入杭在八月安得有嘗州被禽之事。其誤
二也。元史張士誠請降。詔以士誠爲太尉。士德爲淮南
行省平章政事。時士德已爲大明兵所禽。此丁酉八月
事也。若士德丙申七月就禽。則去士誠納款已一載餘
矣。安得有平章政事之授耶。其誤三也。士德以好賢下

士創造伯業如王逢楊維禎楊基者頌慕之辭久而不替不獨陳基輩也假令以二月入吳七月就縛居吳不及半載又提兵往來三郡無須臾之暇士德雖有過人之略何以能深得士心若此其誤四也王逢梧溪集云今太尉開藩之三月令部將王左丞晟書使踵海上招至吳中以予避地無錫說晟勸張楚公歸元元追封士德爲楚國公擢淮省都事予辭不就士誠之歸元其謀皆出于士德逢以元之遺老與有謀焉令丙申之秋士德已爲俘虜逢雖欲緩頰何以自效其誤五也元史紀丁酉歲士誠屢爲楊完者所敗然後乞降士德被禽在七月而元

之招諭在八月。則士德被禽時。歸款之事已定矣。實錄謂我欲留士德以誘士誠。士德間遺書士誠。俾歸元以謀我。乃誅之。國史既誤記士德被禽于前。而不欲泯其主謀降元之事。故曲爲之辭。非事實也。其誤六也。然此事所以傳譌者。蓋亦有故。丙申七月。既禽張湯二將軍。十一月。又禽其梟將張德。用兵之際。羽書交馳。奏報錯互。流傳既久。卽聖祖製碑之日。亦止據一時功狀書之。未及是正耳。余謂此論最覈。但國史全用劉辰事蹟原文。失之不考故也。輟耕錄云。長興陷。管州又陷。士德戰敗被禽。縛致集慶。俾其作書勸士誠歸附。士德以身

殉之終無降意。豈所云間遺書士誠俾降元者。緣此事傳會耶。嘗州被圍。至丁酉三月始下。則士德斷以其年被禽。平吳錄載士德援嘗州被禽。卽在丁酉三月。蓋皆以嘗熟州爲嘗州也。高岱鴻猷錄謂戊戌十月。廖永安擊士誠于太湖。戰敗。士誠囚之。上欲以所獲將士三人易永安。士誠不從。士誠母念士德。欲以永安易士德。上不許。此又與劉辰母痛其子之說相似。然士德旣爲謀主。上必欲畱以誘士誠。未肯遽取而甘心也。如岱所記。則士德至戊戌冬猶存。安得直書伏誅于被禽之後耶。更考之。

七

實錄丁酉七月丙申。元帥胡大海克休寧。進攻婺源。元將楊完者率兵十萬欲復徽州。大海還師與戰于城下。大敗之。殺其鎮撫李才。完者遁去。九月癸酉朔。元婺源州元帥汪同與守將鐵木兒不花不協。以總管王起宗等詣雄峯翼降。土命皆仍其官。錢氏辯證云。徽州城下之戰。寧河神道碑記寧河與越國同事。而實錄本傳從之。胡越國新廟碑記此戰專屬越國。而實錄從之。按是時寧河守徽州。越國進取婺源。完者兵寇徽州。寧河以守將禦寇。而越國還兵合擊之。則此戰兩公共事。無

疑也。碑載是戰在十月。實錄在七月。攷程國勝神道碑。國勝以是年十月。從衛公戰敗苗軍。則當以十月爲正。奏報偶異。史家之叅錯多矣。又國勝神道碑載汪同與國勝等偕降徽州城下之戰。國勝已在行間。則較實錄所載。益大相矛盾矣。攷寧河神道碑城下之戰。在是年十月。惟戰在十月。故國勝旣降。遂得奉寧河調遣。如戰在七月。而同等降在九月。則絕不相蒙矣。按徽州之戰。諸書所載互異。皇明通紀云。丁酉七月。命鄧愈。胡大海將兵取徽州。拔其城。元帥汪同率所部來降。九月。元苗帥左丞楊完者。自杭州率兵數萬。欲復徽州。時胡大海

攻婺源未回。城中守兵甚少。大海聞之。自婺源還師。兼程而進。與鄧愈奮兵出戰。十一月朔。大破苗軍于城下。斬其鎮撫呂才。擒其部將胡辛等。完者遁去。夫汪同之降。實錄謂在九月。皇明本記亦同。而通紀以爲七月。蓋據趙汭所撰汪同傳耳。同傳云。丁酉七月。鄧院判繇宣來取徽。踰三日。同日夜往攻之。有備弗克。而元帥帖木兒朶粘。繇婺源攻其後。李克魯本以進士爲帥府都事。與同甚相得。時畱鄧軍中。以書告曰。元帥前後受敵。計將安出。幸至中途。論心不必疑也。同過黃墩。則壯士百數騎突出。克魯曰。主將請元帥相見。同抽刃欲自刺。克

魯抱止之。卽馳馬偕至郡。鄧院判請往金陵。遂見相國。俾平婺源。寅坑口營柵。還居郡城。然則汪同至徽郡在七月。而見相國在九月。卽實錄所云。上命仍其官之日也。程國勝神道碑云。歲丁酉。天兵下徽州。衛國公發同與公等詣京師。上大悅。命同還守婺源。而以公等從征伐。十月。苗軍楊完者部兵十萬薄徽州。公率百餘人。橫戈鼓譟衝之。衆皆辟易。自相枕籍。而統軍胡大海之兵適至。因覆其營。生禽其將胡辛等二百人。楊完者僅以身免。觀此則鄧愈之功。卽國勝之功耳。元史丁酉八月。以楊完者爲江浙行省左丞。先是完者守嘉興。與

張士誠相拒。未遑遠略。士誠既降元。完者以功晉左丞。乃始泰然無後顧之憂。盛兵入犯。覆于堅城之下。其事在十月十一月之交。明甚然而國史所以錯互者。蓋謂汪同以婺源元帥降于九月。而越國新廟碑載其攻婺源。還師破敵。故疑爲同未降時事。不知汪同先以都元帥鎮休寧。既降。而帖木兒等尚據婺源。至明年正月。鄧愈遣王弼孫虎與同等率兵拔之。遂以同鎮婺源。則越國之攻婺源。爲帖木兒等耳。于同何與錢氏能辨城下之戰在十月。而不能辨汪同之降在七月。甚矣考覈之難也。

實錄庚子七月乙丑。陳友諒守浮梁院判于光左丞余椿與饒州辛同知有隙。出兵攻之。辛同知走。光等遂遣人以浮梁來降。命光等仍守其地。既而友諒遣其叅政侯邦佐復攻陷浮梁。于光等敗走。辛丑八月甲申。鄧愈克浮梁。侯邦佐棄城走。戊申。陳友諒平章吳宏以饒州降。命仍其官守饒州。十一月己未。命吳宏等率兵取撫州。宋濂誌于光墓云。歲乙未。徐兵破鄱陽。徐聞君名。急搜訪。獲之。命爲江東宣尉元帥。鎮鄱陽。庚子。徐之柄臣陳友諒殺徐而自立。君乃泣曰。我與陳皆徐君之臣。陳

不道乃爾。我可北面事之耶。是時皇上定鼎建業。君遣使者奉幣以浮梁降。上悅而受之。據此則光爲徐

氏鎮鄱陽而未嘗爲陳氏守浮梁。然又言以浮梁降與實錄合。何也。鄧愈本傳則云庚子守饒州。饒城濱鄱陽

湖而陳友諒據江州。數遣舟師來攻城。愈督兵拒之。屢

敗其衆。辛丑拜江西行省叅政。總制各翼軍馬。是時饒

之境內。岫強者尚懷疑阻。愈示以恩信。衆皆請降。神道碑云

左丞吳宏等皆請降實錄不書鄧愈守饒州事。而本傳特詳之。攷

太祖諭朱夢炎有曰。愈歷鎮八州。有功無過。謂廣德宣徽嚴饒撫南昌襄陽也。則愈之鎮饒無可疑者。程國

勝神道碑云。庚子七月。鄱陽院判于光。左丞余椿。擊走
僞漢守將辛甲而據之。衛公使公往說二人。二人遂以
饒州來附。鄧愈神道碑因之。蓋陳友諒自立之後。以辛
甲守鄱陽。而移于光守浮梁。故光怒而攻甲。遂來附耳。
實錄乃以饒州之降。歸之吳宏。誤矣。攷開國功臣錄。吳
宏。餘干州人。仕友諒。爲江西行省叅政。守餘干。上取
江州。遂全城請降。壬寅。上至龍興。宏率衆來見。遂改
鄧愈江西叅政。宏代守饒州。通紀亦書餘干守將吳宏
請降。餘干新志又云。至正庚子。鄱陽院判于光取饒州。
鄧愈撫之。遂通款。太祖討友諒。舟次康山。幸吳宏營。

升堂拜母。盡歡而罷。遂以宏代愈守饒州。以諸書叅之。乃知吳宏自以餘干降耳。非饒州也。實錄。壬寅正月戊辰。吳宏率衆來見。而鄧愈神道碑載江西叅政之命。則正月四日。宏之代守饒州。當在是春。而實錄併記于辛丑八月。可謂錯互之極矣。又實錄癸卯二月。都昌盜江爵等陷饒州。先是守將于光與吳宏吳毅等不協。爵因乘釁誘陳友諒將張定邊蔣必勝入寇。光等倉卒無備。皆出走。國初事蹟云。饒州平章吳宏調守撫州。太祖命于光爲江西叅政。特遣楊憲齎印信。令光開設分省于饒州。吳宏原部下吳三尉疑卽吳毅不服。糾合王思義謀

叛據城光遁走浮梁。宏之守撫。光之守餽。事關疆場。史皆不載。何以傳信。

九

實錄辛丑三月丁丑改樞密院爲大都督府。命樞密院同僉朱文正爲大都督。節制中外諸軍事。國初事蹟云太祖改樞

密院爲大都督府以朱文正爲左都督又云命親姪文正爲大都督府左都督節制中外諸軍事往鎮江西按此時未置左右都督文正鎮江西在壬寅五月時樞密院雖改爲大都督府而

先任官在外者尚仍其舊。十月戊寅朔增置大都督府左右都督同知副使僉事各一人。甲辰三月戊辰定大都督府官制大都督從一品。左右都督正二品。同知都

督從二品。副都督正三品。僉都督從三品。吳元年十一月乙酉。定大都督府官制。左右都督正一品。同知都督從一品。副都督正二品。僉都督從二品。按太祖以辛丑春爲吳國公。諸子尚弱。獨兄子文正壯勇。故特設大都督以重其事權。維時官制草創。府僚未備。而樞密之官尚襲舊名。亦間以授人。如趙德勝以壬寅四月超授僉江南行樞密院事。見于神道碑。此非樞密院未改都督府之明驗歟。官制之定。蓋自甲辰三月始也。是歲太祖已爲吳王矣。正月置中書省官。三月置大都督府官。文武並建。規模已具。然大都督之職。自文正而後未

有繼者。猶宗人府之不備官耳。至吳元年。更定品秩。遂以左右都督爲長官矣。都督專掌戎機。非親信之臣不授。國初任斯職者。馮勝。康茂才等。二三人而已。馮勝之入都府。自丁未以前。史皆不載。攷勝本傳。癸卯從伐陳友諒。大戰于鄱陽湖。勝功居多。甲辰陞同知樞密院事。乙巳從左相國徐達伐張士誠。丙午取湖州。轉大都督府同知。洪武元年正月。加都督府右都督。兼太子右詹事。所載功次官爵亦多疎略。鄭曉異姓諸侯傳云。癸卯士誠圍安豐。從上奮擊敗敵。陞同知樞密院。調擊廬州。與本傳不合。然考鄱陽之役。勝以從行舟覆遣還建

康安得謂勝功居多。則勝自以安豐功陞。非以鄱陽功也。事在甲辰三月未定官制以前。故仍樞密之號耳。實錄乙巳十月辛丑書同知樞密院馮國勝等率師取淮東。至丙午三月。諭徐達等。則稱副使馮國勝。蓋以高郵之敗。貶一官也。不稱樞密者。時已定官制。其改都督副使明矣。後十一月。徐達遣國勝徇下湖州。遂有同知都督之轉。異姓諸侯傳云。丁未召還治軍府事。叅知政事張昶陰事覺。勝鞫誅昶。以平吳功陞右都督。國初事蹟云。昶心懷舊主。以國事通。獲其書。太祖令馮國勝楊憲鞫之。處以極刑。實錄于吳元年六月。書叅知政事張

祖謀叛。上令大都督府按問。則知是時治都府事者

勝也。吳元年九月。文書平吳師還。論功行賞。召都督馮

宗異。康茂才。

國勝宗異。即馮勝別名。時勝與茂才俱同知都督。稱都督者。省文耳。

都督副

使張興祖。梅思祖等。于戟門。賜綵段表裏。諭曰。從軍在

外。與經營布置在內者。任雖不同。其勞則一。宗異畱守

京城軍府之事。獨任其勞。亦宜受賞。而封宋公。鐵券文

亦云。居京師。則除肘腋之患。歷征戰。則建爪牙之功。蓋

按問張祖一事。有以深結主知。若此矣。洪武改元之正

月。以卽位推恩。例加右都督。仍同知都督府事。是夏。勝

以本職從大將軍取陝。爲征虜右副將軍。尋命畱守汴

梁實錄或稱同知。或稱都督。互舉之文耳。

自洪武元年四月戊午以

後俱書都督同知二年七月辛亥又書都督十二月辛巳仍書都督同知

王氏二史攷以爲

勝以平吳功進右都督。至北征復稱都督同知。意者初改樞密院爲大都督府。其左右都督俱從一品。後進一品。而同知爲從一品。宋公因從品改官耶。將有別故鑄秩耶。夫更定品秩在吳元年十一月。而勝之加右都督則在明年正月。前後旣不相蒙。且初定官制。右都督僅正二品。後進二品。則同知爲從一品。安得謂從品改官也。若謂別故鑄秩。則勝當時寵任方隆。無纖介之嫌。卽二年平涼之役。擅引兵還。上猶以勲舊置之。而他何

論焉。是未知元年之進右都督祗爲加授。至三年正月。命都督馮勝爲右副將軍。征沙漠。以後俱稱都督。則此時始論北征功實。授右都督耳。勝在都府最專且久。國史旣多錯互。而諸書因之紛紛傳訛。皆不考官制之故。故備論之。

十

元史至正二十一年五月癸丑。四川明玉珍陷嘉定等路。李思齊遣兵擊敗之。實錄明玉珍本傳。戊戌二月。玉珍破嘉定。盡有巴蜀之地。則在至正十八年。先三年矣。元史至正二十三年三月甲寅。明玉珍破雲南。五月辛

未稱隴蜀王。二十三年正月壬寅朔稱帝。平胡錄諸書並同。而實錄紀庚子夏陳友諒弑徐壽輝自立爲帝。王珍不與相通。遂自稱隴蜀王。則至正二十年事也。壬寅三月己酉稱帝于重慶。癸卯十二月遣司馬萬勝等率兵攻雲南。甲辰三月鄒勝入雲南。四月引還重慶。是雲南之破在王珍稱帝之後二年。錢氏辯證以爲元史脩于洪武元二。隴蜀未入職方之時。而實錄則平夏之後本其載記而存之。斷以實錄爲正。是也。黃標平夏錄自王稱帝年月並同實錄。惟破雲南在癸卯二月八日。引還重慶卽在其年四月。滇志至正二十二年明王珍遣

李芝麻帥兵三萬。繇八番分陷雲南。二十三年。梁王遣大理宣慰使段功。敗玉珍兵于關灘。追至回燈關。大破之。考之實錄。乙巳十月。上聞明玉珍取雲南。失利。遣書戒之。則關灘之敗。當在甲辰。非癸卯也。滇載記又云。癸卯。明玉珍自將紅巾三萬。攻雲南。此尤紕繆不足辯。

十一

實錄。辛丑八月丙午。蕲黃廣濟降。九月壬子。以左右司員外郎陶安爲黃州府知府。乙巳正月甲戌。調黃州府知府陶安知饒州府。徐紘集傳云。癸卯黃州平。上思得重臣以鎮之。遂命知黃州。改桐城令。尋移知饒州。實錄

本傳無癸卯及
改桐城令二語

謝理太平人物志亦然與實錄不合然

集傳謂黃州平以重臣出鎮而蘄黃之降則在辛丑不
應至三年後始簡守臣實錄所書殆不妄也錢氏辯證
云陶學士詩集自龍鳳元年乙未至九年癸卯安皆在
金陵壬寅歲有憶別之作云七年同在省東廳則辛丑
歲安未嘗出守可知也癸卯秋從征鄱陽甲辰守黃州
有今年春二月聖書命守土兩句抵黃州又值連月雨
之句則安以甲辰守黃州在平陳理之時當以徐紘集
傳爲正陶學士事蹟載令旨付陶安者凡二俱稱皇帝
聖旨吳王令旨其授黃州府知府則龍鳳十年二月授

鄱陽府知府則龍鳳十年十二月則安之守黃移饒皆在甲辰年無疑也。惟徐紘謝理所紀改桐城令他無可攷而學士集甲辰十月七日舟發樅陽詩自注云時遷往桐城舊縣。又記龍鳳甲辰秋九月千秋節亦在桐城。至聞除代者及召還之命則云年殘動歸思客至報除書海內招文學淮南起謫居。又有臘八日發桐城詩則知安守黃未幾謫爲桐城令。至臘月召守饒州乃發桐城也。割付所載授鄱陽年月與詩悉合。乃知二傳之有據而實錄與本傳咸有脫誤矣。俞本記事錄至正二十三年十二月。中書省郎中李君瑞陶主敬都事王用和。

簡較鄧永真陳養吾博士夏允中等俱令家人私通敵境于四沙易鹽提至軍前俱剝衣鎖項置小船中置于黃鶴樓下大浪中凡三日沉江而死惟李君瑞兩腿扒一千下安置桐城縣按陶學士文集申辰歲守黃未幾謫爲桐城令安之被謫必以癸卯從征令家人易鹽之事也俞本所記當不謬其云俱置黃鶴樓下沉江而死則當有誤蓋主敬但謫桐城而王用和以壬寅二月死于金華也余按錢氏謂安守黃州在平陳理時亦未盡然攷學士集有悼故妻喻氏詩自注壬寅卒于官舍其詩云江南開大閫幕下叨備員石城奏雄捷銜命使淮

延慈親念行子。加殮勞氣。纏哭哭奉湯藥。深夜更煮餐。
慎終禮必誠。淺土封亦堅。庶冀良人歸。中心無悔愆。移
家指鳳臺。華省初依蓮。忽我病二載。將謂難久延。何意
壬寅冬。瞑目在我先。是時領公務。夜宿郭北田。此篇自
述履歷甚詳。壬寅冬。安已官黃州。而謂甲辰始出守。可
耶。詩中奉使。延慈親淺土之事。皆本傳所不載。又有
癸卯閏三月十九日奉旨代祠寶公詩。則離黃還省。以
後作也。以諸書反覆考之。乃知安凡再守黃州。一在辛
丑之秋。一在甲辰之春。斯黃初附。卽輟省臣以坐鎮之。
越二年召還。從征鄱陽。未幾復典故郡耳。然劄付必至。

甲辰始給者。時上始爲吳王。得承制除拜。前此猶以
省郎領郡事。故也。果如所言。甲辰守黃。未久卽謫桐城。
則本傳何以稱其寬租省徭諸惠政哉。列朝詩集謂安
歷左司郎中。出知黃州。降桐城令。移知饒州。仍改知黃
州。蓋錢氏亦自覺其辨證之誤矣。然安再守黃州。皆在
謫桐城之前。而謂知饒州後。仍改黃州。又何據耶。實錄
年五月己亥召知饒州府家人易鹽之事。主敬賢者。決
陶安爲學士諸齊並同不肯爲。攷其集中甲辰書事詩。首云離家仲冬望。沂江
至鄂渚。卽癸卯從征時也。中云可怪近日來。船兵忽暴
禦快槳。躡洪濤。劫貨殺物主。登岸拆郵亭。伏莽襲商賈。

則所云令家人私通敵境者意亦船兵所誣耶。癸卯十二月提至軍前。甲辰二月何以復有守黃之命也。豈此事之發在武昌既平後耶。國初事蹟請夏煜犯法。取到湖廣投于江。與記事錄合。按陶學士集有洪武元年送夏允中總制浙東兼巡撫詩。則元年允中尚在。安得云沉江而死。以此觀之。俞本所紀未足信也。

十二

實錄壬寅七月丙辰。平章邵榮。叅政趙繼祖謀反。伏誅。上閱兵三山門外。榮與繼祖伏兵門內。欲爲變。會大風卒發。吹旗觸上。衣異之。易服從他道還。榮等不得

發遂爲宋國興所告。按西寧侯朱晟本傳云。太祖起兵濠梁。晟父朝用與兄國興隸行伍。俱積功至元帥。則國興者晟之兄也。然不載告變事。楊士奇撰西寧侯神道碑。則云。歲壬辰。公隨父朝用。兄國興來歸。明年。從克濠州。父兄竝以功授萬戶。甲午。從張天祐克五河泗州。盱眙。又竝進總管。乙未。從上克和州。渡江。下采石。太平。總管邵榮等潛有異謀。國興察知。以聞。榮等伏誅。從克溧陽。進攻南臺。國興戰沒。命公襲兄職。據此。則邵榮之異謀。發于乙未。下太平之時。而不在壬寅。平處州之後。時地相去遠甚。而其官止總管。非平章也。然國史所

列邵榮戰功如於杭湖州之役不一而足皆在取臺城
後又豈盡贅誤耶以事勢推之初渡江郭元帥張天祐
尚主軍事太祖未正位號榮亦何所嫌忌而欲爲不
利乎實錄旣指宋國興爲證而碑稱國興戰沒于臺城
下距壬寅已七年安得復有首告之事攷宋晨本傳晨
自以戰功累授千戶非襲兄職則國興之戰沒爲虛戰
沒爲虛則其首告之事在壬寅秋信矣楊公身典國史
所勒豐碑之文必按貼黃及家狀而前後乖互若此不
可曉也國初事蹟云邵榮與叅政趙某謀爲不軌元帥
宋某以某事首告

楊榮撰宋朝用墓碑云國興以
功授總管沒於王事與此不合 太

祖命壯士執邵榮趙某連鎖置酒待之榮不飲酒止是追悔而泣。太祖亦淚下趙某呼榮曰若早爲之不見今日獵狗在牀下死事已如此泣何益惟痛飲。太祖命縊殺之籍其家榮本麤悍武夫恃功觖望或有之其爲之謀主者繼祖耳然觀其呼榮數語深咎爲之不早則所云伏兵三山門者蓋亦國興上變之詞未必盡實不然。太祖何以心憐之而欲錮之終身哉。

十三

實錄癸卯三月辛丑朔上率右丞徐達叅政嘗遇春等擊安豐時呂珍殺劉福通而據其城聞大軍至極力

拒守廬州左君弼出兵來助珍遇春擊破之珍與君弼皆遁走上乃還國初事蹟云癸卯三月張士誠圍安豐福通請救太祖親援之先遣嘗遇春至安豐士誠遂解圍福通奉林兒棄安豐遁于滁州居之士誠兵復入安豐守之丙午三月太祖取安豐

史乘考誤引此條作丙午三月

太祖取林兒安豐按諸本皆無安置之語此考誤之誤也

俞本記事錄云安豐被

張氏圍困城中人相食小明王在城中號安陽奕劉太保等饑餓無措遣人求救上親率大兵援之大敗張氏邀請小明王及母妹并臣劉太保悉領五奕官軍棄城詣廬州營中上設鑾駕傘扇迎駐滁州創造宮殿

居之。易其左右宦寺。奉之甚厚。據實錄則太祖救安豐時。呂珍已殺劉福通。據其城。以諸書考之。則安豐尚未破。福通尚未死。上親總大軍。解其危困。小明王以剗殘餓羸之餘。猶得擁虛器于滁。久而無恙者。誰之功也。史臣于龍鳳事。委曲避諱。既不著小明王之終。故于安豐之殺。直言劉福通爲呂珍所殺。而小明王之亡。隱然言外矣。然考太祖卽位告祭文。歷舉戡定之地。以廬州左君弼。安豐劉福通並稱。則福通蓋非死于珍者也。福通不死。則其主可知。且太祖所以拒劉基之諫而赴安豐之急者。爲小明王在焉故也。誠令安豐已沒。

于張氏則太祖必不親行矣。高岱鴻猷錄云。上至安豐。擊呂珍破之。珍棄城走。上遂以宋主韓林兒還金陵。諸將議于中書省。設御座。奉林兒。劉基曰。彼牧豎耳。奉之何爲。密陳天命所在。上意悟。會陳友諒入寇。遂議征討。不果奉。夫牧豎之說。本黃伯生所爲。劉基行狀。原無宋主還金陵一語。其云中書省設御座。將以正月朔旦行慶賀禮者。意如今郡國歲時設龍亭拜賀之儀。未必宋主親至金陵也。岱旣誤認。又以行狀在庚子年。于事勢不合。故移于癸卯安豐迎歸之後。影響牽合。失之愈遠矣。

十四

實錄癸卯七月戊子指揮韓成元帥宋廣陳兆先戰死友諒驍將張定邊奮前欲犯上舟舟適膠淺我軍格鬪定邊不能近嘗遇春從旁射中定邊定邊始却俞通海來援舟驟進水湧上舟始脫是上舟膠淺在韓成戰死之後而開國功臣錄云上舟被圍韓成進曰臣聞古之人有殺身以成仁者臣不敢辭遂賜成龍袍冠冕對賊投水中賊稍止諸將亦來援得脫實錄韓觀本傳亦不載其父成代死事諸書豔稱之比于紀信之誑楚然余竊疑焉兩軍相持勝負未有所分而其主將粹然自投于水耳

目眇亂衆心必解而敵且乘其後安肯反自退沮以待
諸將之援此與榮陽被圍時形勢絕不類殆好事者爲
之耳及攷朱善撰程國勝神道碑云張定邊奮前直犯
御舟舟適膠淺公仗劍叱之急與帳前左副指揮使韓
成水軍元帥陳兆先駕舸左右奮擊會鄂國公從旁射
中定邊虢國公疾懼來援舟進水湧御舟遂脫而公等
反遶敵艦之後援兵不接力戰死書法最爲詳明然則
成等致命之時御舟已脫安有代死証漢事耶以此知
功臣錄固出附會而實錄亦未爲盡覈也功臣錄又言
上念成效死祀諸臣于康山以成爲首凡三十六人

程國勝與焉。按實錄中書省列進康山忠臣三十五人。首丁普郎。次張志雄。又次成。大明會典亦同。則成曷嘗首祀康山哉。成若代死。則必首祀。成不首祀。則不代死。此最易辯者。獨程國勝之死。實錄紀于癸卯四月。洪都被圍之初。與神道碑不合。錢氏辯證。以爲國勝與牛海龍夜劫陳友諒營。牛中流矢死。程泗水得脫。逕達金陵。從太祖親征。死于鄱陽湖。南昌城中不知也。次年甲辰。追錄諸臣。南昌報程與牛俱死。得與祀贈侯。饒州又以國勝死康山事來上。又得與祀贈伯。當時事冗。不暇兩相參訂也。實錄載國勝與牛海龍俱戰死。蓋據南昌

所上國勝死事狀也。甲辰立廟。國勝兩得與祀。而實錄則于兩廟皆佚其名。後是有建議祀典重複者。遂罷程豫章之祀。厥後有司又并罷康山之祀。修會典者亦因之沿襲至今。國勝遂不復預兩廟之祀矣。據此則康山廟祀當併國勝爲三十六人。按實錄于甲辰兩廟之祀俱不及國勝。而癸卯四月則書國勝與牛海龍俱戰死。後俱配享洪都功臣廟。所謂洪都廟者卽南昌廟也。然國勝不與海龍同死而與韓成同死。則祀于康山爲宜。釐祀典者削彼存此可矣。名山藏載宋國興衣袍代死寧絕類韓成皆妄也

寶錄申辰九月。書下中興路及峽州歸州而不書取天
臨路。于丘廣本傳則載克潭州。按元史是月。大明兵取
中興及歸峽潭衡等路。潭州元之天臨路也。通鑑博論
亦書甲辰歲。廬州中興歸峽潭衡等路悉皆歸附大明。
今從之。又寶錄乙巳正月。取寶慶路。洪武元年二月乙
卯。又書取寶慶路。其中必有再陷之事。而記者失之耳。
攷元史乙巳六月辛丑。湖廣行省左丞周文貴復寶慶
路。而寶錄不載。但于七月庚申。紀辰州周文貴既走湖
南。其黨欲復其城。率衆寇辰溪。殺縣丞高文貴。奪印掠
居民。又于八月。紀周文貴復攻辰州。千戶何德使別將

與戰西門之外。自將輕騎直抵其寨。攻破之。文貴退保麻陽。德追擊之。文貴遁去。以日月先後考之。乃知文貴是時舉兵寶慶。進窺辰州。而其黨卽攻辰溪以應之也。實錄洪武元年正月。周文貴自全州引兵援永州。左丞周德興等擊之。文貴敗走。蓋文貴自辰州敗後復屯寶慶。與元兵合。至是爲周德興所破。而楊璟遂乘勝窮追。復取其城耳。當依元史補入。

十六

續綱目書丙午十二月韓林兒卒。平胡錄亦書龍鳳十二年冬。十二月宋主昚皆不言其卒于何地。而鴻猷錄

謂丙午宋主殂于金陵。謬也。庚申外史云。先是小明王駐安豐。爲張士誠攻圍。乘黑夜疾風暴雨而出。居于滁州。至是朱鎮撫具舟楫迎歸建康。小明王與劉太保至瓜州。遇風浪掀舟沒。劉太保小明王俱亡。則是宋主未至金陵而沒于風浪。有天意焉。通鑑博論則于至正二十六年書廖永忠沉韓林兒于瓜步。大明惡廖永忠之不義。後賜死。夫永忠卒于洪武八年三月。賻遺甚厚。以其子權襲爵。國史略無貶詞。何緣定爲賜死。而野記云永忠侍宴。醉後忤旨。立擊死。國初事蹟云。永忠以僭用龍鳳不法等事處死。王氏二史攷引永樂中紀綱獄詞。

有廖永忠開國功臣僭犯被誅之語。乃知永忠固非令終者。而博論爲洪武末寧獻王奉勅編進之書。其言又非無徵也。錢氏辯證謂永忠以小人之腹爲君子之慮。一旦沉林兒以逢上指論功之日。使所善儒生窺瞰上意。可謂果干誣上而巧于要君矣。聖祖對廷臣訟言之。以逆折其邪心。厥後卒以不義賜死。聖祖之心事。百世而下。昭然如日月之中天。永忠有掩面于地下而已。豈不愚而可憐哉。然則聖祖之誅永忠也。何以不明正厥辟。而以僭犯爲詞。曰念其兄也。念其功也。正其辟則弗可以襲矣。殺其罪以存其嗣。忠厚之道。

也斯言也誠辨矣。抑攷庚午詔書云。楊憲居中書。心謀不軌。廖永忠黨比其中。人各伏誅。方孝孺換詹鼎傳亦云。憲敗。凡爲憲用者皆受誅。則永忠之誅。蓋因黨比楊憲耳。非以沉韓林兒故也。瓜步之事情狀曖昧。若謂太祖心惡其不義而隱忍數年。信任不衰。卒以他事誅之。將使天下後世反有義帝江南之疑。豈若風浪掀舟之說。彰彰可信哉。故論小明王事者。斷以庚申外史爲正。

十七

宋濂撰章溢神道碑云。上召問征閩諸將何如。對曰。

御史大夫湯和。繇海道進。平章政事胡廷瑞自江西入。此固必勝。然閩中尤服浙江平章李文忠之威信。若令文忠從浦城取建寧。此萬全計也。卽日詔文忠出師。如公策觀此。則文忠出師在丁未冬。繼湯廖之後而實錄紀于洪武元年二月。福建既平之時。章溢本傳又與碑同。攷之野史載文忠取建寧屯浦城。以候舟師。蓋文忠以編師先趨建寧。摧其門戶。爲大軍聲援。初未深入也。平圍之後。金于隆等殘寇未殄。更命文忠率兵討之。岐陽主神道碑與國史專紀元年之役。里漏甚矣。按封晉國公誥詞有再入旣闔。削平餘寇之語。蓋指此耳。然則

六王戰功見遺于史者多矣。况其他乎。

雲間王光承 吳 騏 王 烈

同郡姚宗典 金俊明 陸元輔

陳 瑚 顧有孝審定

國史考異卷之一 終